

ԱՆՅՈՐԳԸ ԵՒ ԻՐ ՃԱՄԲԱՆ

(ԲԱՆԱՍՏԵՂԾԻ ՅՈՒՇԱՏԵՏՐԻՑ)

Գրեց՝ ԿՈՍՏԱՆ ՁԱՐԵԱՆ

ԼԵՆԻՆԸ ՄԵՌԵԼ Ա...

1.

Երէկ գիշեր պատուհանիս՝ խորով կը պըրած թղթերի վրայ յունուարը մղկտում էր:

Թէյս պաղել էր: Գաբերս, վերմակի մէջ փաթաթուած, նստել էին սահնակ եւ երեւակայական մի Սիբերիայում, ուր փայլուն եղջիւրները վրայ ձիւն էր մաղում, անյայտ ճամբաներ էին անցնում:

Քասնհինգ մոմնոց ելեքտրական լամպարը, ձեղունի բարձունքից, ճպտոտ իր աչքը յառել էր թանձր շուքերի վրայ եւ բարակ իր թելերի միջից կայծկլտուն անհանգստութիւն էր տարածում:

Գուցէ մի քիչ լոյս լինէր:

Երեւանի ելեքտրակայանը ծեր է եւ թուլամարմին: Իր երակները արիւնը չափուած եւ հաշուած է: Եթէ, օրինակի համար, այնտեղ վերը, Նորքի ստորոտում, քամիների մէջ նստած քառակուսի հիւանդանոցի վիրարութական սենեակը լուսաւորեն ու, շտապ քայլերով, մտահոգ հիւանդապահներ շարժուն օրհասական մի մարմնի շուրջը՝ մայրաքաղաքի բոլոր տները կլորոճորմի տակ կը թմրին, լամպարները կը սկսին բաց-խփել եւ գիշերը կը սրսփի:

Երէկ գիշեր, անհանգիստ խաւարը դողդողում էր սեղանիս վրայ, կարճատես իր աչքերը կպցնում էր գրքերին, հայ գրերի մըրջիւնները կուտակում, յանկարծ վառուած եւ նորից, կամաց-կամաց, մարուում... Ջղայնացայ:

Գուժաբեր այդ մթնոլորտին համակերպելու համար, կոնակա տուի բազկաթոռին, աչքերս փակեցի եւ փորձում էի ներքին լուսութիւն հաստատել, երբ նախասենեակում, քամին յանկարծ իր գլուխը զարկաւ դրան, եւ մէկը քայլից: Ետ դարձայ՝ անձանթ մի մարդ էր:

Կարող էր պատահել, որ նոյնիսկ ծանօթ էլ լինէր. գուցէ մի տեղ տեսել էի կամ, ո՞վ է իմանում, գուցէ եւ չէի տեսել:

Երկայնահասակ, նիհար, ցանցառ միրուքով, մեծ փայլուն աչքերով: Հայ իրականութեան մէջ մաշուած մտաւորականի տիպար, մինակեաց փիլիսոփայ, թէեւ տարօրինակ կերպով լիչեցնում էր ծանօթ իտալացի մի պատմաբան: Անշուշտ նա չէր. նա չէր կարող լինել: Մինչ ես, մի քիչ մտահոգ, դիտում էի անձանթին, նա մի աթոռ առաւ, նստեց սեղանիս մօտ եւ շատ հանգիստ ձայնով ասաց.

— Դրսից լոյս տեսայ՝ մտայ:

Ասեց եւ մեծ ուշադրութեամբ սկսեց չորս կողմը նայել:

Նայում էր, ու սենեակս քանի գնում կարծես մեծանում էր: Պատերը աննշմարելի կերպով հեռանում էին. դեղնած, կտոր կտոր ընկած թղթերը, որոնց վրայ ժամանակին ծաղիկներ կային, վառվառն գոյն էին առնում, կենդանանում եւ, այլևս բաց տարածութեան մէջ, փոթորկալից մի երկնքի տակ, լերան վըրայ վառուած խարոյկների պէս, քամիների շնչի հետ ծալում էին ու գլուխները վեր հանած բռնկում:

Աչքերս վեր առի՝ ձեղունը անհետացել էր. անհանգիստ ամպեր էին անցնում, կուտակում, փուռում: Հորիզոնի վրայ գուգահեռական երեք կարմիր գծեր ալիքների նման տատանում էին, յետոյ խառնում, վեր ցըցւում ու գրկում՝ արագօրէն վար իջնող ամպերին:

Յունուարը շարունակում էր մղկտալ: Երթնքներիս կպցրած թէյը սառն էր: Թղթերը, չորցած ոսկորների նման, պատուհանի վրայ ճայթում էին:

Մարդը, տարօրինակ կերպով հանգիստ, մեքենարար մի գիրք առաւ ձեռքը, խաղաղ աչքերով նայեց, յետոյ փակեց, դրաւ սեղանի